

البولس

رسالة القديس بولس الرسول الثانية لتيموثاوس

احتمل المشقات .. تَمَّ خدمتك

في تبعية ربنا يسوع، هانواجه تحديات و ضيقات و آلام و صراعات ... في الأوقات الصعبة و المظلمة دي، وجود ربنا و محبته بيبانوا جداً لينا ... بيبقى ربنا مصدر التعزية الحقيقي لينا ... عشان كده لازم نحتمل المشقات و نمشي في سكة ربنا (اللي آخرها لأبدية سعيدة) مهما كانت المشقات في السكة عشان الهدف اللي بنسعى له هدف عظيم جداً تهون قصاده أي تضحيات

طبعاً الملخص ده لا يغني أبداً عن الوعظات و التأملات العميقة في كلام الكتاب المقدس ... دي محاولة بسيطة لتقديم ملخص بسيط للأسفار

عن السفر

عدد الإصحاحات: 4

ظروف الكتابة: ?

- دي الرسالة الوداعية بتاعة القديس بولس (آخر رسالة كتبها)
- كتبها من السجن في روما ... قد يكون الفترة اللي كان محبوس فيها في بيت (مذكورة في آخر سفر أعمال الرسل) أو بعد كده لقا أخذ حريته فترة و دخل السجن بعدها
- هو كان في فترة المحاكمة قدام نيرون ... و طبعاً كان واضح إت النتيجة مش في صالحه ... بولس كان عارف إن قدامه أيام قليلة، فكتب لتلميذه عايز يشوفه و يودعه و يسلمه آخر توصيات


السفر موجّه لمين؟

- لتلميذه و شريكه في خدمته تيموثاوس
- تيموثاوس ساعتها كانت خدمته في أفسس
- دي أكثر رسالة شخصية كتبها بولس الرسول (معظم الرسائل كانت لجماعة المومنين في مدينة معينة)

هدف السفر: ✓

- بتفكرنا إن كل خدمة بولس الرسول عبارة عن رحلة من التحديات و التضحيات و احتمال المشقات ... لأن ده حال كل واحد فينا عايز يمشي وراء ربنا في حياته، لازم يمشي زي بولس الرسول الرحلة دي
- و الرحلة دي مش معناها إن ربنا بعيد، بل بالعكس ... الوقت اللي الضيقات تزيد فيه هو أكثر وقت نحس فيه بحضور ربنا معنا
- لازم في تعليمنا نركّز على هدف الكتاب المقدس: الإيمان بربنا يسوع المسيح كمخلص لينا





اقبل دعوتك و مسئوليتك كخادم

من البداية لحد إصحاح 2 آية 13

تبعية ربنا صعبة و فيها مشقات كثير ... لكن الهدف عظيم جداً ... فلازم نحتمل زي الجنود و ظي الأبطال

[تفاصيل أكثر](#)



التمذة لضمان معلمين صالحين

من إصحاح 2 آية 14 لحد إصحاح 4 آية 5

الكنيسة محتاجة معلمين أمناء في توصيل الإيمان الصحيح و الحفاظ عليه ... و ده بيحصل بتسليم الإيمان الصحيح لناس أمناء ... أما المعلمين الكذبة فيجب مقاومتهم

[تفاصيل أكثر](#)



توصيات ختامية

من إصحاح 4 آية 6 للآخر

بولس بيوصي تيموثاوس بزيارته بسرعة ... و بيطمئنه إنه رغم ترك الناس لبولس في محاكمته, إلا إنه حش بتعزيات ربنا و وجوده معاه

[تفاصيل أكثر](#)



1: اقبل دعوتك و مسئوليتك كخادم




- (إصحاح 1 : 1 ل 5): يبدأ القديس بولس الرسالة بشكر خاص لعائلة تيموثاوس ... جدته لوئيس و أمه إفنيكي ... هم دول اللي ربّوه تربية صحيحة على الكتب المقدسة (العهد القديم ساعتها) .. عشان كده الإيمان كان مزروع فيه من و هو صغير
- (إصحاح 1 : 6 ل 18): عشان الإيمان ده بقى ... بيثبت بولس الرسول تلميذه .. و يقول له إنه عمره ما يخل من تبشير الناس بكلمة ربنا ... ولا من معلّمه الأسير اللي في السجن ... و بيدعوه إنه يجي يزوره
- (آية 15): طبعاً الكلام ده كان له سبب ... إن السجن المتكرر لبولس الرسول خلّى كثير من تلاميذه يشكّوا فيه أو يخلوا منه و يبعدوا عنه
- طبعاً إن تيموثاوس بروح لبولس و هو مسجون ده موضوع صعب ... عشان كده بولس في الإصحاح الثاني بيشرح لتلميذه إزاي لا يستحي به
- (إصحاح 2 آية 1): بيّفكرنا بولس الرسول إن نعمة ربنا هي اللي بتدّي القوة لينا ... و يشبهه خدمة للسيد المسيح ب 3 تشبيهات:
 1. (آية 3 و 4): جندي بيحاول يرضي القائد بتاعه
 2. (آية 5): بطل رياضي بيتمرّن عشان يكسب مسابقة
 3. (آية 6): فلاح بيتعب في الأرض عشان تجيب ثمر
- كل دي أمثلة لناس بتشتغل لهدف كبير مش هدف شخصي ... هدف يستاهل منهم تضحيات كثيرة
- (آية 8 و 9): طبعاً أكبر مثال هو السيد المسيح نفسه اللي من أجل فدائنا (هدفه) تحمّل الصليب
- (آية 10): و تلاميذ السيد المسيح مشيوا في نفس السكة ... و منهم بولس نفسه طبعاً، المسجون في روما من أجل الكرازة بالسيد المسيح
- (آية 11 ل 13): لكن طبعاً التضحيات دي آخرها انتصار و تتويج و تكليل بالنصر ... و كل ده بقيامه السيد المسيح ... و احنا هانملك معاه في مجده فقط إذا فضلنا أمناء ليه و كانت حياتنا لمجد اسمه

نتعلّم إيه؟

الطريق صعب و الباب ضيق .. و محتاجين نستحمل و نصبر عشان في الآخر ننال الملكوت

— يا رب إديني الصبر و الاحتمال ... أخط هدفي قدامي واضح: ملكوتك ... و أحتمل لأجله كل شيء

2: التلمذة لضمان معلمين صالحين



- في الجزء الثاني من الرسالة، معلمنا بولس يقول لتيموثاوس إنه يواجه المعلمين الفاسدين اللي في أفسس ... الناس دي بقت عاملة زي السرطان في جسم الكنيسة ... و أثروا في شعب الكنيسة بتعاليمهم الفاسدة
- (إصحاح 2 آية 18) : و أحد تعاليمهم إن القيامة الأخيرة حصلت خلاص ... و قالوا إن مافيش حاجة اسمها رجاء في القيامة الأخيرة و الخليقة الجديدة (أورشليم السماوية)
- (آية 2) : و بالتالي بولس كان بدأ الإصحاح الثاني بوصية لتيموثاوس ... إنه يسلم الإيمان الصحيح لمعلمين أمناء عشان يحافظوا عليه ... زي ما هو استلم من بولس
- (آية 23) : و يبعد عن المناقشات عديمة الجدوى مع المعلمين الفاسدين
- (إصحاح 3 : 15) : و يكون هدفه و المعلمين اللي معاه هو التركيز على الكتب المقدسة (عهد قديم و جديد) اللي بتشاور على الخلاص بالسيد المسيح و الإيمان به
- (آية 16) : و بيؤكد معلمنا بولس إن الكتاب المقدس كله اتكتب بإرشاد الروح القدس ... عشاننا احنا نسلك بصلاح يليق بأولاد الله

نتعلم إيه؟

التعليم في الكنيسة مسئولية كبيرة جداً ... كنيسة بدون إيمان مستقيم صحيح مالهاش أي لازمة ... لازم كل جيل يسلم الإيمان للجيل اللي بعده من خلال معلمين أمناء

— يا رب كتر هؤلاء الذين يفتلون كلمة الحق باستقامة ... أنعم بهم على كنيستك المقدسة ليرعوا قطيعك بسلام

3: توصيات ختامية



- (إصحاح 4 : 6): في الختام القديس بولس يفكر تيموثاوس إن الوقت قدامه في الدنيا محدود
- (آية 21): و طلب منه يبجي يزوره قبل الشتاء ... و يجيب معاه الرداء الشتوي و الورق اللي بولس سابه في ترواس
- (آية 16 ل 18): و بيقول إنه الناس كلها تقريباً تركته في السجن و المحاكمة ... لكنه كان حاسس بوجود ربنا يسوع معاه ... و عارف إن ربنا دائماً معاه و هابتقده حتى لو مات

نتعلم إيه؟

ماحدش يقدر يسند الإنسان في ضيقاته غير ربنا ... الناس مهما عملت، هايبجي وقت تسيبنا فيه ... أما ربنا فوقت الضعف يكمل

— 🙏 يا رب إديني أحس بوجودك في كل ضيقاتي و مشاكلي ... أجري لك انت مش لغيرك يا رب

أهم الآيات

آيات تلخص السفر

إذ أتذكر الإيمان العديم الرياء الذي فيك، الذي سكن أولاً في جدتك لوثيس و أمك افنيكي و لكني موثق أنه فيك أيضاً

— إصحاح 1 : 5

📌 ده دور الأم في البيت المسيحي المظبوط ... الجدة و الأم بيعلموا الكتاب المقدس و الإيمان ... يبقى أكيد البيت ده هايطلع قديسين

فتقوى أنت يا ابني بالنعمة التي في المسيح يسوع

— إصحاح 2 : 1

في سكة ربنا فيه مشقات كثير ... لكن ولاد ربنا أقوياء بنعمة ربنا الساكنة بغنى فيهم

صادقة هي الكلمة: أنه إن كنا قد متنا معه فسنبيا أيضا معه. إن كنا نصبر فسنملك أيضا معه. إن كنا ننكره فهو أيضا سينكرنا. إن كنا غير أمناء فهو يبقى أميناً، لن يقدر أن ينكر نفسه

— إصحاح 2 : 11 ل 13

ربنا بموته أعطانا حياة

لو آمننا به و كانت حياتنا معاه رغم الضيقات، هانملك معاه في الآخر

أما اللي يرفضه، فربنا هايتترم قراره ... لكن عليه إنه يتحمل البعد عن ربنا في اليوم الأخير

لكن حتى لو احنا مش أمناء مع ربنا كما ينبغي، هو هايفضل أمين معانا في وعوده و عهوده

الملخص: دعوة للإيمان بربنا رغم التضحيات

و ما سمعته مني بشهود كثيرين، أودعه أناساً أمناء، يكونون أكفاء أن يعلموا آخرين أيضاً

— إصحاح 2 : 2

دي التلمذة في الكنيسة ... دور المعلم الأمين إنه زي ما استلم الإيمان صح و كلم الناس بيه صح، إنه يتلمذ ناس بعده يكلوا تعليم صحيح

أهم صفة في الناس دي الأمانة ... عشان يحافظوا على الإيمان المستقيم ولا يتأثروا بأي حاجة محيطه بهم

و أنك منذ الطفولية تعرف الكتب المقدسة، القادرة أن تحمك للخلاص، بالإيمان الذي في المسيح يسوع

— إصحاح 3 : 15

دي رسالة الكتاب المقدس ببساطة ... آمن بربنا يسوع المسيح الفادي المخلص

في احتجائي الأول لم يحضر أحد معي، بل الجميع تركوني. لا يحسب عليهم. ولكن الرب وقف معي وقواني، لكي تتم بي الخرازة، ويسمع جميع الأمم، فأنقذت من فم الأسد

— إصحاح 4 : 16 و 17

موقف صعب جداً طبعاً على بولس الرسول العظيم اللي بشر و تلمذ كثير و ناس كثير خلصت على يديه ... و تحمل كثير جداً عشان يوصل كلمة

ربنا للناس ... ما يكونش معاه أي حد و هو بيتحاكم؟!

لكن بولس بيقول لنا: لا يحسب عليهم ... مش مشكلة

تفسير بعض الآيات

كل الكتاب هو موحى به من الله، ونافع للتعليم والتوبيخ، وللتقويم والتأديب الذي في البر. لكي يكون إنسان الله كاملاً، متأهباً لكل عمل صالح

— إصحاح 3 : 16 و 17

الروح القدس أرشد كتاب الأسفار عشان يكتبوا اللي ربنا عايز يقوله لشعبه

و الكتاب اتكتب عشان نتعلم (تعرف حاجات احنا مش عارفينها)

و توبيخ و تقويم و تأديب للبر ... يعني بعد ما أتعلم و أعرف ربنا عايز إيه، لازم أعمل بالكلام ده

و في الآخر ابن ربنا لازم يكون زي ما بنقول في القديس: نزيد في كل عمل صالح

و أما أنت فقد تبعت تعليمي، وسيرتي، وقصدي، وإيماني، وأناتي، ومحبتي، وصبري، واضطهاداتي، وآلامي، مثل ما أصابني في أنطاكية و إيقونية و لسترة. أية اضطهادات احتملت! ومن الجميع أنقذني الرب

— إصحاح 3 : 10 و 11

مش بس التلمذة بالكلام ... التلمذة الحقيقية بالأعمال ... بالسيرة اللي كلها محبة و احتمال عشان ربنا و عشان الخدمة بولس بيدّي مثل باللي حصل له في لسترة مثلاً ... لما جه اليهود من أنطاكية و إيقونية و 'رجموا بولس وجروه خارج المدينة، ظانين أنه قد مات ... ولكن إذ أحاط به التلاميذ، قام ودخل المدينة، وفي الغد خرج مع برنابا إلى درية. فبشرا في تلك المدينة وتلمذا كثيرين. ثم رجعا إلى لسترة و إيقونية وأنطاكية. يشددان أنفس التلاميذ وبعظانهم أن يثبتوا في الإيمان، وأنه بضيقات كثيرة ينبغي أن ندخل ملكوت الله' (أعمال الرسل 14) ... طبعاً ظانين أنه مات يعني كان بين الحياة و الموت ... نلاقيه تاني يوم بيكمل خدمته عادي جداً .. ما أعظمك! و عنده ثقة عظيمة جداً في ربنا إنه دائماً هانجيه من كل الضيقات

و أما أنت فاصح في كل شيء. احتمل المشقات. اعمل عمل المبشر. تتم خدمتك

— إصحاح 4 : 5

ملخص الرسالة كلها ... و طبعاً اللي بيقول الكلام ده عاشه و اختبره ... فالرسالة معايشة و قوية و واضحة: استحمل و قول التعليم الصحيح مهما الناس رفضت و قاومت

المراجع الرئيسية



- موقع [The Bible Project](#)
- وعظات أبونا داود لمعي من [برنامج فتشوا الكتب](#) أو من [المكتبة الصوتية على موقع كنيسة مارمرقس](#)
- موقع [القديس تكلاهيمانوت](#)